

DISPUTATIO JURIDICA,
DE
VARIO JURIS
USU ET ABUSU IN CU-
RIIS ET CANCELLARIIS,

Vom

Gebrauch und Mißbrauch der
Rechten / in Sangleyen und
Rathhäusern.

QUAM

D. T. O. M. volente,

SUB PRÆSIDIO,

VIRI

NOBILISSIMI, AMPLISSIMI, CONSULTISSIMI,
DN. ARNOLDI MAURICII
HOLTERMANNI,

J. U. D. Consiliarii Hassiaci & Pandectarum
PROFESSORIS Ordinarii, &c.

Pro viris publicè defendere conabitur,

Ad futurum diem 12. Jun. horis locoq̃ue solitis

BOGUSLAUS SIGISMUNDUS COLMER,
EQUES-POLONUS.

Marburgi Catterum,

Typis JOH. HENR. STOCKENII, AN. 1681.

DISPOSITIO
DE

VARIOLIS
USU ET ABUSU
RIS ET CANCELLIS

Georgius et Elisabetha
Georgius in
Georgius

D. T. O. /

DR. ARNOLD
VOTERMAN

Georgius et Elisabetha

Georgius et Elisabetha



DE
VARIO JURIS USU ET
ABUSU.

THES. I.

Non communio *Platoni-*
ca sed *Iustitia* est præstantissimum
litium, processuum & controver-
siarum remedium: hæc ergo vige-
re debet in foro, Curia, Cancel-
laria aut alio quocunque Prætorio:
quæ omnia si rectè atque ordinè
constituta perflugium præbent & asylum non tantum
vi & armis oppressis sed & injuriâ affectis, aut qui ob
inopiam à potentioribus jus suum consequi non pos-
sunt: ob hanc causam jura inventa & Judicia constitu-
ta, ne tenuiores & inferiores potentioribus semper
sint obnoxii: nè à præsidio juris pauperes arceantur:
quare si hi ob suam inopiam, ambitum vel adversarii
potentiam Advocatum & Patronum non inveniebant,

Prætor iis aliquem ex officio dabat : quo exemplo hodie multis in locis inopū causis certo & publico stipendio est destinatus Patronus. Forum ergo & Curia Juris & Justitiæ fuit promptuarium olim, prudentiæ Juridicæ quasi apertum supplici innocentie atque simplicitati sacrarium. Hodie multis in locis hominum ambitione & temporum conversione factum hoc est proh dolor! Juris & Justitiæ conditorium : cujus aditus angustior factus quam ut destituta simplicitas facile eo penetrare possit : qui intrant ad primos actus litium hilares ingrediuntur, quasi *Benevento* venerint, ast in litium catastrophis quasi *Malevento* tristes & vultuosi domum redeunt, etsi victores ; quia controversiarum alimentis, multum sortis decoctum, carè enim in foro emittur litigandi experimentum, in quo tanquam in nundinis, non tantum JUS sed & sæpe *injuria* est tibi redimenda, si jus tuum servare cupis : Lis liti hic agnascitur. Pagmaticis præsertim malis jucundum saltare orchestra contentionis & discordiæ, imò in litium mæandris consensescere : nec his tantum, sed homines etiam litium fugitantes, lites abrumpere etsi velint, non tamen pro lubitu possunt, sed versuram quasi facere coguntur, altius statim luto negotiorum hærentes : signum quod hodie Judiciorum aditus non sint obsepti, sed exitus : quod verum esse, clarè apparet, si res alicui sit cum assiduo quasi fori alumno & Appianæ perviciæ

Litiga-

Litigatore, qui, nisi prorsus in suas leges, conditiones nec ferre nec accipere destinavit: hic intra orbem litium quasi conclusus, quomodo quæso sine jactura facultatum, sine suggillatione queat erumpere: Causa tot litium unde, nisi à perfidia & calumnia? unde immortalitas, nisi à fraudibus & tergiversationibus? Sententiarum inconstantia, nisi ab iniquitate, imposturâ, juris perturbatione, & imperitia. Ob sumptuum im-
menforum necessitatem, tenuiores à jure suo arcentur, ut tolerabilior sit *injuria* quàm *judicium*: ut opprimi sæpe sit satius quàm vindicari: Hodie ergo cum *Seneca lib. d. Tranq.* forum & Curiam loca possumus dicere, *exercendis in pulico vitiis destinata.*

Th. II.

Litigare per se non est malum, nec Christiano simpliciter prohibitum, non tamen omnibus expedit, tam propter honestatem quàm pacem: quis sine peccato judicio potest exire? annon ubilites, etiam sunt discordiæ, odia, injuriæ, sæpe cædes? Quot sunt litigantium incommoda? Quot causæ pereunt Juris inopia? quot Pragmaticorum culpa & perfidia? Quot suo quodam occidunt fato, vi infamiæ aut à pecunia malè valentes? *Lites perduntur, quæ paupertate reguntur.* Et confidentia & diffidentia nimia hic periculosa est: hæc vexat, illa fallit: sæpe præstat semel vinci, quàm sæpius vincere, potest enim victoria esse Cadmæa.

Et o quàm multos poenitet victoriæ forēsis! Victoria trium processuum in Cancellaria vel Curia saepe divitē facit divertere ad miserabile Hospitalis remediū. Si hoc fit triumphanti, quid fiet succumbenti? Noli ergo litigare, solve potius quod debes: præstat jactum litis facere quàm naufragium census: seges enim litis seminis saepe plus poscit quàm redditura est messis. Dubia martis hīc alea, multos perducit ad tabem litigatores, unde domus eorum collabuntur, ut & mures indè migrare teneantur. *Honor ergo est homini separare se à contentionibus: omnes stulti miscentur contumeliis, Prov. c. 10.* Honor est imò heroicæ virtutis opus, reconciliatio & amicitia: magnanimus est, qui in pace poscenda alterum prævenit: annon Deus gratia sua prævenit peccatores, in Christo mundum sibi reconcilians. Væ redemptoribus litium: applicari possunt iis omnes plagæ Ægyptiorum in V. T.

Sanguis, Rana, Culex, Musca, moritur pecus, ulcus.

Grando, Locusta, Nox, Mors prius orta necens.

Qui ergo debet litigare litiget, sed in veritate, iudicio, & iustitia: aut ei qui in iudicio vult tollere tunicam det ei & pallium suum. Jam ait Apostolus, 1. Cor. 6. *delictum est in vobis quia iudicia habetis inter vos.* Lis nulla, toga rara, referunt Poëtæ ad vitæ beatitudinem. Vix vir bonus præsumitur frequens litigatur. Remedia ergo litium, quatenus possunt, observari debent; *Patientia;*

*tia; Eccles. c. 28. abstine à lite & minues peccatum. Jus-
jurandum*, maximum litium expediendarum reme-
dium: *pæna* plus petitionum & infamia damnatorum
in actionibus bonæ fidei: vocatio ad Syndicatum, pri-
vatio cinguli, restrictio licentiæ provocandi, tentatio
concordiæ, cum macra sit melior concordia quàm pin-
guis sententia. Utinam constituti essent in hanc rem
publici arbitri! Cur non etiam judicarium vectigal
posset instituere Princeps, ut duos aureos quilibet a-
ctor solvar Fisco, recipiendos si jure litigâsset, relin-
quendos, si perperam.

Th. III.

Si litigandum est, coram Judice est litigandum, hic
Jus dicit populo, & Salvator *Jud. c. 3. v. 9.* scilicet,
secundarius: quod apud Romanos *Dictatorum*, hoc
apud Judæos fuit fere officium *Judicum*: Debet esse
Vir, bonus, publicâ auctoritate constitutus, juris di-
cendi & æquitatis statuendæ peritus. Princeps solus
negotiis suis dijudicandis non sufficit, per alios ergo hoc
faciet, sed viros potentes, timentes Deum, in quibus
est veritas, qui oderint avaritiam. *Exod. 18.* Hi *Dii* ve-
cantur, quia Dei judicium est. *Deut. 1. Exod. c. 12.* DE-
US cum *Adamo* primum Judicium exercuit & exerce-
bit quoque ultimum: Deum ergo bonus Judex præ-
oculis habebit, *Sap. c. 6.* Deus quoque erit eorum
propugnator & defensor, contra quoscunque etiam
Dœ-

Dæmonum & sagarum insitum odium : quas si cum aliis publicorum criminum reis non puniant, criminum participes fiunt, & ipsi puniendi. *1. Reg. 15.* cautè tamen & juxta præscriptum legum hîc procedent, nà fortè eradicent cum Zizania triticum: omnia enim scandala quomodo de mundo possunt tollere? Zelum immoderatum quem non regit lex & ratio hîc damno: capita hominum non sunt pilæ, quas leviter & temere jactare licet aut ad levissimum rumusculum torquere sine gravissimis indiciis *arg. l. 1. ff. d. quest.* Theologos volo, & Ictos sæpe & Academias consulat, non proprio confidat ingenio, quum aliquem conjicit in equuleum. Oarduum, & horrendum munus Judicis!

*Vos, quibus Rector maris atque terra,
Jus dedit magnum, necis atque vita,
Ponite inflatos tumidosque vultus,
Quicquid à Vobis minor extimescit,
Major hoc vobis dominus minatur.*

Th. IV.

Iudex ergo in judicio gravius errat, quàm privatus: peccata illius & perperam judicata sparguntur in omnes, perinde ut gubernator, non vero si aliquis nautarum erret, si delinquat, commune est infortunium omnibus navigantibus: Non sequetur hic propriam opinionem & phantasiam, sed leges, probata & allegata. *l. illicitas. §. veritatis ff. d. off. pres. l. f. C. d. poen.*

pæn Jud. qui mal. jud. ex credulitate sua neminem debet condemnare etsi sciat innocentem, cum sit persona hic publica: hæc una ex miseriis Judicum, sequi sententiam alienam. *Aug. lib. 19. d. civ. Dei. c. 16.* Sed periculum nullum subest, si testes accuratè examinentur, aut ipse induat personam testis, remisso reo ad superiorem Judicem, aut alio modo consulat innocenti sine scandalo vel per fugam. Nonnunquam potest aliquem condemnare, etsi nullus sit accusator vel actor, & fallit illud, *wo kein Kläger ist/ da ist auch kein Richter.* Cum crimen scilicet est notorium, aut contumacia præstat locum accusatoris, aut virtualis sit accusator, infamia publica ad instituendam inquisitionem. In sententia tamen ferenda nè semper sit pedarius vel Judex ad idem: uti nec adessores debent esse assentatores: discrepantes etiam in ferendis sententiis, non inde odio habendi; nec spernenda sententia plurimorum concordans, nec in dubio discedendum à Judicio multorum, quanquam à singularibus opinionibus temperare sibi debeat Judex, & potius glossæ ordinariæ inhærere, ut *Bononienses Caroccio* & ductor navis timoni. Subtilitas nimia absit à judiciis, inimica est sapientiæ & simplicitati & in juris interpretatione, juris sæpe rationem & æquitatem evertit, sunt Judices Legum interpretes non domini, ut ad libidinem eas interpretentur & ita perfringant Justitiam ipsam, quæ

non ingenio hominum sed ex artis facultate aestimanda: animi sæpe est ingenui, cum multis errare quàm uno. Illi omnia desunt, qui sibi nihil deesse putat: quisque ergo sua verecundè & modestè aestimabit, aliena callidè & magnificè: modestia maxima, aliena pluris quàm sua facere. *Tiberius* olim satis prudens, nihil ex sese, sed minima quæque ad Senatum retulit: in quo omnia bene sese habebant, quamdiu aberat discordia, pervicacia & simultas inter collegas. Collegio concordi nil firmitus ad firmandam Rempublicam. Fateor, singulos dissentire fas est sed re integra, ast peractâ & perfectâ, quod pluribus placuit tuendum. Allegationes Doctorum variorum: Judices fatigat & cui bono fiunt? non enim ex auctorum opinionibus pendet legum auctoritas, sed ex hac pendet Doctorum opinio. Utinam jus certum statueretur: quod pragmaticorum astutiis, non fingeretur ac refingeretur ut cera: unicuique litium minuendarum & evitandarum remedium: hoc Judicum efficere sententias certas, litem finientes, non litem ex lite generantes.

Th. V.

IN omni rectè constituto iudicio, quilibet Iudex, Magistratus, Senator, ab omni affectu liberum retinebit animum: in gratiam alicujus contra conscientiam nunquam iudicet: non sequatur *Themistoclem* ad huc puerum jactantem inter suos, *se Athenas totamque Gra-*

Graciam regere: mirantibus cunctis respondebat hoc ;
Se suam habere matrem in potestate , matrem imperare
Patri , Patrem verò Athenis consilia regere publica : At-
benienses verò totius Graciæ Principes esse: non sequatur
Darium conicientem *Daniëlem* in leonis foveam : non
Zedechiam condemnantem *Ieremiam*, non etiam *Pila-*
tum: legis minister, imò lex sit viva, attendens non
 personarum sed causæ merita: non excandescat adver-
 sus malos, non moveatur precibus amicorum. *l. ob-*
servandum. §. C. d. offic. Præs. Nov. 17. c. 2. Proh dolor!
 Necessarii, consanguinei, parentes, conjuges, fra-
 tres, affines, compadres, in expugnandis iudicum ani-
 mis sæpe vim magnam habent: habent & alii affectus,
 coguntque sæpe iudices scientes volentes à recto tra-
 mite discedere, iusti ac iniusti rationem habere: oc-
 cultum ut esset *Davidis* adulterium, sub specie prælii
 occidit *Uriam*: ut vineam sub juris prætextu occuparet
Nabothan interfecit *Jesabel*, Non hoc officium boni &
 incorrupti iudicis. Sol omnibus est communis, non a-
 lius pauperi quàm diviti: ita erit & Iudex, uno oculo
 rem tantum spectabit, personis alterum claudet. Ocu-
 lus fuit olim iustitiæ symbolum: ubi errat oculus, ibi
 aberrant affectus. Poëtæ Iudices velatis pingunt oculis,
 nè in iudicio suspiciat personam ullam sed æquè audiat
 parvum atque magnum, divitem ac pauperem: & ,
 si suum unicuique debet tribuere, æqualiter ei inco-

gniti debent esse, pater, filius, servus, advena, dominus, amicus, inimicus, potens, impotens sodalis, peregrinus, incola: sola cognita veritas: audi o Juxta per Deum hic ipsum præscribentem hoc Deum, cujus tu vices geris & cujus est judicium. *Prov. 24. Deut. 1. v. 16. 17. Ioan. 24. Rom. 10. 12.* Justitia non novit patrem, non fratrem, solam veritatem novit: exuit personam Judicis, quisquis amicum induit: æquitas sinistram odii & amoris dextram ignorat: quare causæ pauperum non longius extrahendæ, & causæ divitum citius expediendæ: par debet esse utriusque ratio, nec vel longior ad probandum terminus vel informandum uni quàm alteri est concedendus gratificandi studio: cur ergo sæpe in pauperum causis ostenditur rigor, in divitum dispensatio: cur illæ negligenter audiuntur, hæc subtiliter. Audiant *Jacobum* Apostolum. *c. 2. v. 1.* cur in Curii & Cancellariis, nil æquæ Justitiam frangit, quàm malorum affectuum ingens varietas. *Kanutus* dum latrocinantes ultimo curaret supplicio affici, quidam exclamat è medio damnatorum, *atque ego sum, Principis Kanuti cognatus, jure etiam sanguinis ei devinctus.* quo Rex audito, respondit: *Cognato nostro ut honoratior sit locus, sublimiorem parate crucem.* *Jobannes Baptista* Regis *Herodis* personam non respexit. *Marci. 6. v. 17.* Cognati, amici, honorandi, sed usque ad aras Justitiæ,
Eigner

Eigner Rug/ befreundter Raht/

Hat verderbt Troja/ die groſſe Stadt.

Casus pro amico, est casus pro Diabolo. O quam multæ sunt hodie Curix elingues, in quibus dicere quod velis periculofum, quod nolis miserum est, in quibus exulat amor veritatis & libertas, occupatur assentatio, adulatio & dissimulatio, exulat constantia: utiam exularet quoque privatum commodum, quod publico semper decebat cedere. Utinam non vitia ret judicia insufficiencia regentium & incapacitas ex defectu eruditionis, & virtutum ad judicandum & consulendum necessariarum.

Th. VI.

PRæterea judices in determinandis causis sicuti vitare volumus *precipitantiam & tarditatem* nimiam, ita *ordinem* sequi debent *judicialem*. Hic ad inventus est non tantum ad judicii solennitatem, sed etiam ad justitiæ naturalis conservationem. Cognitio causæ sententiam debet præcedere, aut hæc erit ipso jure nulla. Deo nihil est absconditum, in judicando tamen *Adamo*, ut Judicibus seculi exemplum daret, hunc ordinem observavit c. *Deus omnipotens. 2. q. 1.* In puniendis Sodomitis *Gen. 19.* in Achan *Jos. 7.* in Villico *Luc. 17.* & hunc quoque servabit in extremo judicio, ad *Thess. c. 4.* Rectè *Nicodemus*, nunquid lex nostra judicat hominem nisi prius audierint ex ipso & cognoverint quid faciat. *Johan. c. 7.* Temerarium judicium sequitur judici-

um perversum: quare, *antequam scruteris, ne reprehendas: intellige prius & tunc increpa*: ex sola accusatione neminem condemna, reum quoque se defendentem audi & aliorum sententias & judicia exquire: veritatem dies aperit, pœna dilata potest exigi, exacta revocari non potest. Seria res quando agitur, in morâ multum est consilii. *Alexander Severus* re proposita Consiliariis, ad cogitandum dabeat eis spatium, nè incogitati de rebus magnis sententiam dicere cogerentur, maximè in criminalibus: hic enim

Res tibi cum morte, non est hac alea lusus:

Tereus ante tremit, tu magis ipse treme.

Pedetentim hic Iudex procedat: *nulla de morte hominis cogitatio longa*. Præceps cavendum iudicium, ubi provocacione error non potest corrigi. Optimus Iudex citò intelligit, lentè iudicat. Non impetuoso animo aut præcipitato feret sententiam, sed sedendo, oculis apertis, manibus privatus: imò licèt tot habeat oculos, quot fabulosus Argus, vix litibus examinandis universis sufficeret. Citò credebat *Josua* & à *Gabaonitis* delusus est. *Jos. c. 19.* Ut ergo nocet præcipitantia, ita & tarditas nocet justitiæ, quâ plus æquo producuntur & laxantur judicia: imò *convertuntur in amaritudinem & fructus Justitiæ in absinthium*: certè utilius est, citò causâ cadere, quàm post multos sæpe annos vincere, victoriâ Cadmeâ. Hi Iudices ex *justitia*
faci-

faciunt *justitium* : non vocant *in jus* sed *in injuriam*, ob tot dilationum corollaria, intercessionem futes, pro-vocationes improbas, postulationes protervas, eremodicia affectata. Quid hisce justitia est aliud, quàm *constans & perpetua voluptas jus suum cuque promittendi*. Lites ita videmus non lustrales sed seculares hoc tempore & hac morum iniquitate: ô quantum hoc peccatum! Profectò ex majoribus hujus mundi plagis & afflictionibus cum sint processus, annon maximæ erit charitatis illos impedire, aut saltem quàm potest fieri brevissimè definire: ne Judicii ordo & processus fiant ambages, confusio, labyrinthus, asylum calumniæ, scopulus aut vadum, in quo causæ seculis aliquot adhærescant. Saluberrima ergo fuit constitutio Justiniani in *l. properantur. Cod. de jud. l. fin. C. ut intra certum temp. quæst. crim. termin.* utinam servaretur ita, nè fugiens prolixitatem incidat in noxiam breviteratem

Th. VII.

Cancellariæ, Curia, Judicia, publicæ sunt functiones, Dei administrationes, ergo ad has eligendi viri sapientes, timentes Deum: qui oderint avaritiam: qui dignitatem criminibus non prostituunt, qui magistratum non pecuniâ, aut fautoribus sed virtutibus ambiunt. Utinam nemo ad mitteretur, nisi à sordibus, ambitione & ambitu purus. Ambirus quæcun-
que

que facit, ambitio facere compellit. Rectius inviti quàm ambientes in administratione collocantur : hi excudunt pauperes & probos, & pecuniam ad mercandum non habentes : quare ambitus crimini variis legibus in Republicâ Romanâ obviamitur: Lege *Calpurniâ*, *Tulliâ*, *Petiliâ*, *Julia*, & *Novellâ Justiniani* 8. ut Judices sine quoque suffragio fiant. *l. ult. C. ad l. Jul. repetund.* Sed ô tempora, ô mores ubi nunc sunt candidati illi veterum? Ubi nunc non sunt dantes & accipientes? Hi si non essent, & illi cessarent. Quis gratis hodiè promoveatur? quis in honorum petitione non inverecundè ambitiosus? quis quando eos est adeptus, in superbiam non extollitur insolens & intolerabilis? Hic gloriatur se præesse, non curat prodesse: imò se statim meliorem præsumit, quia se cernit superiorem: amicos priores dedignatur, ignorat jam notos, externos comitatur, antiquos contemnit, vultum avertit, cervicem erigit, fastum ostendit, grandia loquitur, subditis est onerosus, gravis & importunus. Jurisdictionis officia vendere, & addicere plus licitanti, quid aliud est, quàm doctæ industriæ & veræ gloriæ stimulos retundere & contra pecuniæ studium & avaritiam commendare? quàm in exilium pellerè omnes bonas artes actenebris demnare omnes virtutes? Qui ergo à Rep. omnem sordium & concussionis labem vult exulare, digni-

dignitates & honores dignis gratis debet largiri non auro & muneribus venalibus habere: qui enim magistratum mercari didicit, nunquam munera capere dediscet, aut sine muneribus aliquid facere volet. Annon Magistratus bonum est publicum civitatis, quod tantum virtuti debetur? Nundinari Magistratus omnis malitiæ initium & finis est: unicum malæ constitutæ Reip. argumentum: inò melius in curiis se res habebunt, si nulli commendarentur sed tantum merita investigarentur, nam vix ulla commendatio sine fūco est. Idonei ergo rebus gerendis præficiendi, probi, docti, prudentes, quos nec ambitio, nec gratia, nec simulatio virtutis aut doctrinæ, nec æstimatio ficta & vulgaris commendat. Princeps ergo in noscendis subditorum suorum virtutibus non debet esse negligens, ne insinuentur in notitiam ejus doctrina & virtute vacui: ne arceantur ab eo calumnia, detractioe & invidia meliores, ne doctiores cogantur studia sua deploreare & parvam virtutis & scientiæ æstimationem.

Hec quor sum in studiis miseri consumpsimus ævum?

Sunt Musa mula nostraque fama, fames.

Quoties honores & dignitates indignis exhibitæ, in eorum commutati sunt ruinam? Quoties infœlix gloriæ & honoris cupiditas immoderatus appetita & usurpata nocuit? *Sophonius Tigellinus* præfecturam Prætorii adeptus, ad guttur usque plenus vento ambitio-

nis, seſtis faucibus novacula vitam miſere finivit. *Sicus Cancellarius* decapitatus in arce Mediolanenſi, antequam cervicem præberet liſtori, dixit: *à me il capo, à te il ſtato*: ita ſæpe inter maximam fortunam & ultimam nil intereſt, *Summum ad gradum claritatis cùm veneris, conſiſtes agrè, citiùs quam deſcendas, decides*: quare *ad regimen homo venire debet, ſicut ad ſurcam*, ne dum in ſummo exaltatur, illaqueatus cadat. quare ô Deus, *concede mihi pauca habere & nullius indigere: modicis rebus longius ævum eſt*: & tandem eadem moriendi neceſſitas omnes involvit, quæ viliffimum mendicum. Vale ergo terra, Salve cœlum!

Th. VII

UT Cancellariæ & Curia vacent omni defectu, requiritur in primis ut Judicum in his perſona omni virtute emineat: hic enim de alterius errore debet judicare, qui non habet quod in ſeipſo condemnet. In Judicum ergo numerum admittimus etiam peregrinos & exteros: invidioſè *peregrinitas* monnunquam ab indigenis objicitur, cùm virtus debeat eſſe patria: rectè *Cicero* ſuis reſpondit adverſariis, *peregrini non habendi, quorum jam & nomen & honor, urbi & hominum fama & ſermonibus inveteravit*. Spuriſ ad magiſtratum hunc non admittimus multarum civitatum & populorum exemplo. *Deut. 23. l. generaliter. §. ſpurios. ff. d. decur. l. honor ff. d. mun. & bonor.* Se-

nes tamen junioribus hic præferimus, ob sapientiam, experientiam & multarum rerum usum, tertium illorum oculum. Adolescentia docta potest esse at non est prudens, nec habet auctoritatem: ad honores evecti, pejora facilius audiunt juvenes, & per hos labefactatæ sæpe Reipublicæ, restitutæ sunt à senioribus: illi prius remis quàm gubernaculis admovendi: horum plus valet umbra, quàm gladius. Hi ergo potius in tribunalibus collocandi, quàm juvenes vertibiles, gloriosi, inconstantes, nimis creduli, animosi, impatientes, inexperti, omnia assertivè dicentes, ut de seipsis opinionem faciant, quòd omnia sciant, cum tamen pauca firmiter cognoscant: apud Romanos non nisi senex fiebat Senator, juniores prius consilii publici spectatores, quàm consortes, existere. *Celsus* tamen adolescens admodum jus civile interpretatus est, *l. 9. ff. de verb. obl. Nerva* filius ætatis suæ anno XVII. de jure respondit *l. 1. §. 3. ff. de postul.* Nec ab honoribus pauperes excludendi sunt, abundantes bonis animi, justitiæ, sapientiæ & pietatis auro. *Bajazetes* exprobrabat *Tamerlani* natale pastoritium: respondit ille. *Nescis & ex lana ovium purpuras Regum fieri.* Pessimè hodie, census sæpe facit Magistratus & Scabinos, ac si probitas & sapientia sita esset in magnitudine possessionis & non in bono animi statu: saturitas sæpe patet ferocitatem & imperitia potestati conjuncta in-

saniam : at divitiæ innocenter partæ & modestè habitæ, ad commendationem Judicis faciunt, si iis bene utatur; facilius alieno & muneribus abstinebit, minus à populo contemnitur, majori auctoritate valebit: utraque extrema ergo hic vitanda? *Scipioni & Æmiliano* neque *Sulpitium* neque *Cottam* mitti in Hispaniam placuit, *quòd alter nihil haberet, alteri nihil satis esset.* Decor & forma, in apta quadam membrorum figura consistens eximium Dei donum est & Magistratum seu Judicem ornat, cum facies cujusque mentis sit forma, imò deformis vix bonos habere possit mores, quia magnis mentibus digna corporum domicilia metari censetur ipsa natura; scientiam tamen & doctrinam præferimus: hæc per se est de numero bonorum honorabilium: *ubi non est scientia, non est bonum. Prov. c. 13.* Jurisprudentiæ Judici per necessaria: jus quomodo dicet, qui id non caller? Stulti hæc dispiciunt. *Est malum quod vidi sub Sole quasi per errorem egrediens à facie Principis: positum stultum in dignitate sublimi & divites sedere deorsum: vidi servos in equis & Principes ambulantes super terram quasi servos Eccles. c. 10.* Annon quotidie hoc ipsum videtur, divites in sapientia & doctrina, divites operibus bonis, sedent deorsum tanquam ignobiles & non admittuntur ad officia & magistratus, at imprudentes, indocti & inculti promoventur ad dignitates,

tates, sedentque in sublimi ut cœci ad foveam: cùm tamen fundamentum & fons omnis veræ felicitatis, laurus perpetuò virens & nunquam marcescens sit doctrina & peritia, cum pietate & probitate conjuncta: absque his virtutibus, quid sunt Judices, Consiliarii, Prætores, Scabini, Consules? Pyxides venustæ, veneranda nomina, pulchra vasa: aperi, inspicce, in iis nec conscientiam nec scientiam invenies: ô testas famias & pulchras, sed vacuas: justitiæ larvas, non effigies veras!

Th. IX.

Proximus *Justitiæ modus est severitas*, quæ & in JUDGE bono valere debet, rigida scilicet & innotata justitia, quâ regna & Respublicæ florent, scelera & flagitia & remonentur, virtutes promoventur, agri, viæ, maria frequentantur, & ubique regnat securitas ac tranquillitas. Hæc severitas non dedet modum excedere; in parvis si est nimia, dicitur *morositas*: in mediocribus, *acerbitas*, in magnis, *feritas*: hæc cavet, ne alantur peccata spe impunitatis; ne sumum jus summa fiat injuria, quando æquiritatem non repudiat, sola verba legis severè urgens, quod vetat *l. 88. ff. d. R. I.* Simulata & ficta severitate nihil est ineptius, hæc parturit injustitiam, concipit dolorem, parit iniquitatem, summo jure qui in aliis usi fuere, ipsi sæpe proprium rigorem experiri coguntur: qui aliorum sanguine de-

lectabatur, suo se respergi ingemuit. Qui ambitionis
 ulnis, quod non debet, amplectitur, quod tenet,
 amittit. In eodem patibulo suspensus est superbus *A-*
man, quod ipse *Mardocheo* paraverat: abutitur Ma-
 gistratus gladio justitiæ quem gestat ad defensionem
 bonorum & videntiæ malorum, si immemor mise-
 ricordiæ, clementiæ & æquitatis, observet solum ri-
 gorem: sine misericordia Justitia est crudelitas, sine
 justitiā misericordia est fatuitas. Nisi æquum & bonum
 jus ipsum moderaretur, summum jus, ut dictum,
 summa esset injuria. *Non sis nimium justus.* In parvis a-
 bire nonnunquam debemus à justitiā, si in magnis
 eam volumus esse salvam. Æquitas est æquilibrium
 justitiæ, ne rigor justitiā superet aut violet, neve ni-
 mia levitas eam perdat & obruat; minus tamen delin-
 quitur in lenitate, quàm in rigore: illi moderi licet,
 huic nequaquam: præstat accusatum absolvere inju-
 stè, quàm injustè perdere, si peccandum est in
 Judicio: illud est peccatum, hoc impietas.
 Sanctius est prodesse malis propter bonos, quàm
 bonis deesse propter malos. Melius nocentem absol-
 vere quàm innocentem condemnare. In dubiis sem-
 per humanitas declinat in leviozem. Æquitas tamen
 non scripta, si à jure scripto non diffidet, Judices pro
 jure scripto ferent sententiam contra æquitatem. *arg.*
l. 1. C. d. l. 5. const. Princ. nec imaginariam ad libitum
 capitis cerebrinam elicere debent æquitatem. Judex
 itaque

itaque criminofum ex una parte caftigando ob culpam
demeritum, ex altera ei compatiatur, quia eſt proxi-
mus ejus. *Vera juſtitia compaſſionem habet, falſa
verò dedignationem:* ideo Magiſtratum ipſum nolun-
teſſe debere ſupplicii ſpectatorē: Ipſe *Nero* juſſit ſcelera,
non ſpectavit: ferina enim rabies eſt, ſanguine & vulne-
ribus gaudere, Vituperandus *Caligula*, qui pœnis reorū
cupidiſſimè interſuit. Vituperandi qui nova & acerba
nimis excogitant ſupplicia: qui puniendi cauſam ha-
bent, modum non habent, cū odiſſe debeamus pec-
cata non homines, quare conſtituti in Curia & Cancellaria
Judices, tractare debent ſubditos cum miſericordia.
Pericles morti vicinus, hoc uno volebat laudari, quòd
nemo propter ipſum unquam pullam induiſſet veſtem. ô Ju-
dices, utinam ſub vitæ finem pro ſe quiſque ita gloriari
poſſet: *propter me nemo atratus fuit, nemo ingemuit,
nemo oculos terſit.* ô clementia nomen non tantum
habes, è cœlo, ſed etiam cœlum dabis! exceſſus ta-
men hic vitandus, ne plus noceat ſæpe patientia Judi-
cum quàm rigor: quia æquè mali ſunt, ſub quibus
omnia licent quàm ſub quibus nihil: non omnis qui
parcit amicus eſt, nec omnis qui verberat inimicus:
nocet bonis, qui parcit malis. Ideo *Maximilianus I.*
loca deſtinata ſuppliciis ſontium præterire ſolens, ſal-
ve dicebat, *ſancta juſtitia:* quia *benedictum eſt lignum
per quod fit juſtitia.* Qua fronte laudatur aliquis qui er-
ga

ga sceleratos se mitem præbet? Si cum mansuetudine iustitia non est conjuncta, Judicum in facinorosos lenitas, nil aliud est quàm in bonos crudelitas, & grave ad quodvis scelus malum: adsit ergo,

Regula peccatis, quæ pœnas irroget aquas.

Th. X.

VEri & fortes debent esse Curiarum Judices: hoc vult Eccles. c. 7. *Noli querere fieri judex, nisi valeas irrumperè iniquitates, ne fortè pertimescas faciem potentis & ponas scandalum in agilitate tua: Pilatus talis non fuit, timuit enim & à proprio conscientiae dictamine recessit, cùm Christum tateretur innocentem: Si hunc dimittis non eris amicus Cæsaris.* Ita Judicialis muneris functio inane erit nomen, formularia & defunctoria tantum observatio. *Quisquis veritatem metu alicujus potentia occultat, iram Dei super se provocat, quia magis timet hominem quàm Deum:* multo magis iram Dei contra se provocat, qui veritatem opprimit & condemnat propter metum superioris potentiae. Proprium itaque Judicis erit veritatem tueri & semper profiteri: animus ejus propter formidinem consilio non debet privari aut turbari, aut flecti potentia hominum amplissimis dignitatibus ornatorum, sed semper manere liber, recti justique tenax, ut si fractus illabatur orbis, impavidum feriant ruinae. *Vir justus quasi cubus est, qui*

ad

ad omnem volubilis fortuna motum, firmus fixusque obssistit. A Justitia ergo non deviat amore consanguinitatis aut carnalis amicitiae. Quid enim sunt nepotes? sæpe non sunt amici, quando nil potes? Quid affines, nisi ad fines, scilicet tuos quos expectant; Non attendit ad personæ qualitatem: fortissimus est, quem nec amor movet, nec timor terret, nec lucrum allicit, nec jactura debilitat, nec amici superant, nec respectus aliquis à recto detorquet. *Cleon* ad Reipublicæ gubernacula evocatus, omnibus notis ac consanguineis unum in locum convocatis, ait, omnem sese nunc amicitiae familiaritatis ac sanguinis memoriam juræque deponere, ne fortasse cæco quodam erga eos affectu adductus à justitiæ tramite & æquo dijudicando defleceret. Robore animi Magistratui hîc opus, quando pro communibus commodis tot adire inimicitias, tot subire tempestates, & toties dimicare debet cum audacibus & potentioribus improcis: ut adversa, quæ contingere solent, constanter ferat, v. g. si existant seditiones, quæ industria componi non possunt, fortioribus remediis sunt coercendæ: existunt aliæ sæpe difficultates & pericula, quibus vigilando agendo & multa prospiciendo firmiter occurrendum est: hinc non illa sunt clara & utilia minus quæ in toga quàm quæ in caliga geruntur. Populi iniquitates velut catenæ Judicem circumdant & vinciunt; fortitudine

tudine indiget ad has dirumpendas. Memorabile est illud ex Annalibus Angliæ: *Henrici IV.* Regis filium, cum servum quem perditè diligebat, omni conatu à tribunali abripere contendisset, furentius in Senatum irruisse: populus vidit hoc ac pertinuit: ast Judex vir justus & fortis hæredem Regni sic excepit: *accelera huc furiose juvenis, gladio quo eodem jam minitaris hoc meum senile pectus, si placet, percutere: nam moriar potius, quam hoc exemplum patiar.* Locus quo nunc abuteris, tribunal tui patris est; Judex, quem invadis, personam tui patris gerit. Lex quam violas, te reum sceleris non filium Principis accusat. Ego igitur tui patris nomine tutiusque regni auctoritate te propter hoc facinus in carcerem abire jubeo: quo tonitru perculsus Juvenis, gladium dejecit, seipsum sententiæ Judicis sponte submitit, & in vincula ultrò se præcipitavit: qua tragœdia aut comœdia audita, Rex senex & sapiens, effusus in lachrymas: *ô me beatum, inquit, qui tam justum & fortem judicem, qui tam piûm & obedientem filium ante sepulchrum video.* Fortis Judex scommata & convicia, quæ per se nullam vim habent non curabit, intereunt etiam si ad animum solidum & sibi constantem applicantur. *Socrates* cum in Comœdia taxaretur, ridebat: *Poliagnus* verò seipsum strangulabat. At tu Christiane Judex attende Christum, medium ægritudinis tuæ: propter te pependit in ligno

gno & nondum est vindicatus & tu vis vindicari, cur non vis tantum & talem Magistrum imitari? an nescis quod omnes qui piè in Christo vivere volunt, maximè Judices, qui officio suo probè fungi volunt, persecutionem patiantur? quare tanquam pro anima tua & usque ad mortem certa pro justitia & Deus pro te expugnabit inimicos tuos. Fateor? grave est excidere Principis gratia: à multo gravius est excidere gratia magni Dei, à cujus nutu regna & imperia pendent. Ast non accrescent ita dignitates alicui à Principe? Sed accrescent à Deo in æternaturo regno: ast inglorius interea vives? In magna gloria est qui placet Deo? quid volatica hæc gloria ad æternam cœlorum? Fortitudinem tamen suam Judex nunquam contra Justitiam applicabit, ut per impressionem, alteri parti æquior, alteram violenta jurisdictione territet: hoc esset à ratione ad violentiam discedere, jus in lege manuum habere, vi ac violentia jura dicere, qui non amplius sunt Judices sed gigantes. Rectè *Tiberius* censuit non utendum Imperio & militibus, ubi legibus agi potest. Fortitudinis enim nullus usus nisi adsit Justitia: si omnes essemus justī, nihil etiam opus fortitudine. Sub prætextu potestatis & Justitiæ, heu quàm multæ fiunt extorsiones, de quibus nemo conqueri audet!

T*Emperantiam* quoque requirimus in Judicibus Curiarum & Magistratibus : hæc virtus affectus regit ac moderatur , ut congruant cum lege naturæ , ordine personarum , locorum temporum. *Mansuetudo* iræ motum refrenat , tendentis in vindictam ? *modestia* superflua non requirit : *Continentia* reprimat motum voluntatis commotæ ex impetu passionis. Si-
 ne *temperantia* feruntur sententiæ certi & definiti juris ratione non temperatæ , nec sequutæ exemplorum vetustatem , literarum fidem , monumentorum auctoritatem : quomodo aliis jura dicet , qui seipsum gubernare non potest ? Qualis hic custos , qui ipse custode indiget. Ex lege *Solonis* ebrius Magistratus impunè occidebatur : apud *Athenienses* princeps ebrius morte mulctabatur. *Plato* vinum iis prohibuit : supprime voluptates & ira supprimeretur : hujus æstu qui fertur & occupatur , inquirendæ veritatis rationem amittit , quare in ira silendum , differendum judicium , donec calor deferbeat. *Omnia quæ iratus agit , errata postmodum intelliges.* Sententia ergo nec hic præcipienda aut exequenda. Rectè Apostolus : *date locum iræ* : nec adversus eos quos malos putat Judex debet excandescere *l. 19. ff. d. off. pras.* Per iracundiam ergo pœnæ non sunt decernendæ : faciebat olim id *Augustus* , sed incurrit hanc reprehensionem

nem *Mecœnatis*, Surge tandem *carnifex* : damnosæ sunt præcipites pœnæ: Legem tulit *Theodosius*, ne quis ultimo supplicio afficeretur ante XXX. diem à sententia lata. Ab invidia etiam ô Judex tibi tempera: hæc radix omnium malorum, seminarium delictorum, materia culbarum. *Venenum aspidis sub labiis invidorum, os eorum maledictione & amaritudine plenum est.* ô livor quantam soles parere *partialitatem*! Ut ab illicito aspectu personarum sibi temperarent *Areopagite*, litium controversias noctu dijudicabant. Incontinens & luxuriosa vita, malorum Judicium propria est: Continentia & corporis bonum est & in animâ temperantiam parit: absint à Curia prandia & cœnæ: apage ista circæa pocula! Animus hic potius curandus quàm corpus: in ideo in Curiam veniendum, ut edamus, ut vivamus? an hic ut in symposiis Græcorum audiendus ille tantùm qui calicem habet? an nulla differentia constituenda inter Curiam & tabernam meritoriam? Sobrietas est mater sanitatis, & hujus soror vinum modicum! sed ô quàm multi sunt, qui sororem magis amant & sequuntur quàm matrem. Vinosi non sunt ad consultandum idonei. Frugalitas est magistra sapientium optimorumque consiliorum, *Spartiate* interrogati cur vinum parcissimè biberent? Respondit *Leotychidas*: ne pro nobis alii, sed nos potius pro aliis, consultemus. Fugite ergo ô Judices &

Magistratus, istos excessus epularumque luxum & libidinem: servate veram continentiam & animi moderationem: Vos quidem Dii estis, at certè ut plebeus homo morituri estis.

Th. XII.

Multa sunt negotia, infinitæ circumstantiæ, omnes tamen sedulò examinandæ ab eo, qui rectè judicare cupit: prudenter omnes conferendæ, ut quid singulæ vel solæ vel cum aliis conjunctæ ponderis habeant, cognoscant Judices: Prudentia ergo opus est iis, id est, habitu illo practico, quo de bono humano quis secundum rationem facile consultat: quare nunquam sine virtutibus prudentia, vel sine prudentia reliquæ virtutes poterunt esse perfectæ. *Beatus homo, qui invenit sapientiam & qui affluit prudentia.* Hujus habitum duo gignunt in Judice, alterum est ut munita sit mens ejus cognitione & disciplina: alterum, ut spectaverit ipse negotia multa: nam solus ille ad singularia perpendenda cœcum habet animum: solus hic in universalium cognitione nihil videbit. Hac virtute qui caret, ut ex oculatus Cyclops quoque versum porrigit manus & certo non utitur scopo, omnia agit ingenti tumultu, nullo judicio. Virtus hæc à *providentia* dicitur, principaliori ejus parte: docet enim quomodo præsentia sint ordinanda, præterita cogitanda, futura providenda: nunc festinat,

festinat, nunc cunctatur, ad singula intentus, tempora observat, locum, personas, causarum qualitates & quantitates expendit, nunc simulat, nunc dissimulat, ita ut in sententiis dicendis, prudentia salis in cibo rationem obtineat. *Estote ergo prudentes, sicut serpentes: citra calliditatem* tamen, quæ justitiæ limites egreditur & non solam honestatem spectat, sed perversa ratione huic præponit, lucrum, voluptatem, honores: quæ perversio defectum rationis non arguit, sed excessum. *Bonus* hinc dicitur *dolus* quî fraudem & malas artes repellit; *malus*, per quem ad iniqua perversa impelluntur ingenia subdoli & fallaces sunt hi, omnia referentes ad suas utilitates, callidi scrutatores latentium noxarum, astu pleni versipelles, simplicitatis inimici, verba habent dubia, promissa parum fidelia, personæ fucatæ, judicia haut quaquam recta, fictæ admonitiones, spectant in insidias, deceptiones, illusiones, parum tutæ sunt cum illis consuetudines commercia, cogitationes eorum plerumque id intendunt, ut fallant, ut per insidias & simulationes, quod cupiunt, assequantur, & magis gaudent se quippiam adeptos versutia & calliditate, quam simplicitate ac recta ratione. Tales si fiant & sint Judices & Magistratus, ut impleant libidines & habendi cupiditatem, mente & cogitationibus suis nihil non versabunt. Nunquam ergo, calliditas, astus, fraus, dolus malus, fal-

fallacia, erit prudentia dicenda: simplicitatem & candorem in Judicibus requiro, non linguam bilinguem: sit sermo eorum procedens ex corde, sicut procedit ex ore, est est, non non *c. etsi. Christus. X. de jurejur:* dolo agit, qui lingua ait, quod corde negat, aures enim humanæ judicant talia esse verba nostra, qualia foris sonant. *c. humana. 22. q. 5.* à Jethro Moyfi consilium datum, Judices subsidiarios ut eligeret, in quibus sit veritas, à quibus absit simulatio, hypocrisis, adulatio: duplices corde averfatur Deus, amat candorem dictorum & factorum, in calumnias & falsa testimonia se verè animadvertit. Egregia habemus exempla Judicum, qui per prudentiam sagaciter veritatem invenerunt *in Salomone. 3. Reg. .c. 3. in Daniele, in Petro Alphonso, Carolo Magno, Rudolpho Austriaco &c.* habemus etiam alia exempla, qui callidè & fraudulentè sub specie prudentiæ decipere alios voluerunt, sed ea numerare jam non vacat, alii jam latè illa deduxerunt.

Th. XIII.

AD superiores Judicum virtutes, quarta cardinalis debet accedere, *Justitia*, & nihil hoc monili pretiosius? bonus hic est circulus, si *justitia* quaerit, *prudentia* invenit, *fortitudo* vindicat, *temperantia* possidet. *Justitia* dicta est, quòd vim sistat, quòd in ea jus consistat, est juris status & habitus per

per quam iustorum operationes fiunt: *constans*
Et perpetua voluntas jus suum cuique tribuendi:
 omnium virtutum domina, regina & mater. Domine,
quis habitabit in tabernaculo tuo? Et. qui operatur
Iustitiam: hæc commune bonum spectat, nec se an-
 gustis quibusdā limitibus contineri patitur, sed ef-
 fundit quaque versum & omnes omnino complecti-
 tur. Neque Hesperus nec Lucifer tam est admirabilis
 quā *Iustitia*. Stellam Serenissimi & loco & animo
 Celsissimi Hassiæ Landgravii gerunt pro insigniis suis,
 quā quasi particularius invitantur, ut à Sole *Iustitiæ*
 nunquam dinoveantur, nec prece, nec pretio, nec
 hominum potentiā, terrore aut proprio interesse, aut
 ullo modo ac respectu occasum sentiant, sed huic
 porro inseparabiliter adhæreant, mane & vesperi,
 præcedendo ad instar *Luciferi*, seu ut *Hesperus* eam
 sequendo: ita fiet ut non tantum sicut stellæ in firma-
 mento cæli, sed ut *Solipse fulgebunt. Iusti fulgebunt*
sicut Sol in regno Patris eorum. Matt. c. 13. Nullus er-
 go erit Iudex sine *Iustitia*: hæc in SS. per oculum
 vigilantem designatur: hujus hyeroglyphicum est a-
 quila perspicacissimi visus, cum inscriptione, *suum cui-*
que. Palma incorrupta ac senii nescia; Lanx & æ-
 quilibrium, momenta causarum ponderans. Hæc
 Dea Iudicibus, Consiliariis, Magistratui perpetua de-
 bet esse comes: sanat enim vulnera populorum, mo-

tus comprimit, pacem & otium cum dignitate constituit, vires Reip. firmat. Hæc veneranda & inexorabilis justitia jugiter colenda, solida ejus effigies in judiciis Curiarum & Cancellariorum retinenda, adumbrata & fucosa ejus, veram eminentem prorsus rejicienda ac detestanda. Retinebitur, si sequantur Judices leges præscriptas, non suam phantasiam aut præsumptam æquitatem: si non sequantur, fallunt & falluntur. ô quàm multi sunt hodie, in quibus deficit *Sal sapientia* & *Sal securia conscientia*: qui contra leges pronunciant, mali Poëtæ, qui præter Musicæ modullos canunt: in tota S. Scriptura nolunt reperiri hæc tria vocabula, FAVOR, FAVERE, FAVOR: quàm pauci pollent *Briennensi Iustitiâ*: quàm pauci dantur *Becchyrii*. Hinc ipse *Alphonfus* Arragonum Rex omnes suos Judices monuit, ne quod suum re-scriptum vel decretum servarent, nisi quod jure & veritate niteretur. *Fridericus* Imp. laudandus, cum *Ladislaum* puerum Hungariæ & Bohemiæ Regem educaret, suaserunt nonnulli, ut unius corpusculi casu, sine invidia & infamia duo florentissima regna sibi adjungeret: *Fridericus*, cui Justitia pluris erat quàm tot regnorum congeries, id noluit, & sceleratum hoc consilium salutari hoc dicto repressit. *Quid ergo inquit divitem potius quàm justum Regem me vultis?* Sanctissimum profectò verbum. Justitia plus solet dicare,

ditare, quàm quæ injusta sententia acquisita. Iniquo
Judice & Consiliario nullum venenosius est ani-
mal: quare

Discite justitiam monite & non temnite Divos.
Non debetis esse sicut Sol, qui alios calefaciens, in se
tamen non habet calorem: ita & Vos ipsi non justii,
aliis tamen administrabitis justitiam: perpendiculo si-
miles eritis, quod prius in se est rectum, antequam illa,
quibus adhibetur, recta recta faciat: regite passiones
vestras, amare veritatem, excutite vanitatem, fugite
avaritiam, magum Dei timere judicium, facite judici-
um vestri & Justitiam alterius: qualis in se quisque
est, talia cuique sunt quæ accipit: non tam de sorte
quàm de electione conqueri possumus: si nos mala
cogitamus, nos agitant mala: si mala quotidie sequi-
mur, meritò nos mala sequuntur. Quo magis spon-
tè humanam justitiam fugimus, eo magis Justitia nos
divina invitos assequitur.

Th. XIV.

Magna præterea virtus est in Judicantibus, *integri-
tas & incorruptibilitas*, si justitia ad quæstum non
abutantur, si Jurisdictio illorum non sit alieni juris ca-
ptio aut ambitiosa: si non committant crimen *con-
cussonis* aut incurrant *Barratariam*: Hæc corruptela
Judicium & Judiciorum omnium malorum est causa,
flagitiorum finis & principium. Si auri sacra fames

proserpit veneranda penetralia, quid potest esse securum? Aut malum hoc usque passim adeò inolevit, ut jam ex consuetudine vendantur leges, jura corrumpantur & sententia ipsa sit venalis, & *nulla jam causa esse possit, sine causa*: nihil pro dolor tam munitum, quod pecunia expugnari non possit: mœrent captivæ polluto Judice leges: ubi nummus loquitur, Tulliani eloqui tuba raucescit. Ingratiis gratuitis & jejuna comitatis vel effœtæ non magna spes collocanda est: gratiæ prægnantes & gravidæ apud Justitiam & Judices magnam vim commendationis habent. Quis dicere nunc erubescit? *Quid tibi dabis ut tibi Justitiam administrem?* Quis in magistratu constitutus, parvo temporis spatio non ingentes congerit divitias? ratio potest dari vel esse hæc:

Accusativus dum venerit ante tribunal,

Proscit in nibilo, si venerit absque dativo:

Nulli cbarus erit, si copia deficit aris.

De hominum judiciis sui ævi questus est olim Solon: rogatus enim *quid esset lex?* subjunxit, *aranea tela*: hæc magnis rumpitur muscis, minores strangulat. *Diogenes* quendam duci conspicatus, qui ex ærario furatus erat phialam, magni, inquit, fures, parvum ducunt. *Privatarum rerum fures in compedibus vitam agere, publicarum in auro & purpura, conspicuos incedere*, dicebat Cato! *Ibi fas, ubi plurima merces.*

Sed

Sed hæ donationes in die judicii quid aliud erunt
quàm damnationes? S. Scriptura ubique extollit re-
futantem munera *Psal. 14. 1. Reg. 12.* Justus Aristi-
des interrogatus, quid esset justitia: *nihil, inquit, alie-
num desiderare. Malè vèrum examinat omnis cor-
ruptus Judex. Vincita est sapientia lucro.* Tamdiu
Regna & Respublicæ feliciter crescunt, quamdiu Ma-
gistratus & Judices suo neglecto, communi bono stū-
dent. Horrendam maledictionem Deus in hos vi-
brat. *Deut. c. 27. v. 25. Psal. 25.* Arcendi ergo à Ma-
gistratibus, qui sunt avari & corruptibiles. Cupidi-
tas quos semel invasit, in aureum quasi furorem vertit,
quos nec mortis timor, nec extremi judicii, nec ipse
horror inferni à muneribus aut pecuniarum appeten-
tia potest avertere. *Felix* Cesareæ Præses tremefa-
ctus est, disputante *Paulo* de Judicio extremo. *Actor.*
24. non tamen satis efficax erat hic horrendi timor ju-
dicii, nam inexstinguibilem pecuniarum sitim in eo
non poterat sedare: tremebant omnia corporis mem-
bra, nec tamen à dandis sibi ab Apostolo, "ut sperabat
pecuniis, oculos avertebat. O quàm multi hodie in-
veniuntur *Felices*, sed revera *Infelices*. Huic vitio
extirpando, quænam poenæ & minæ sufficiunt, abu-
sus hic plus jam valet, quam totoptimæ leges & edicta:
hæc enim chartæ atramento: ille inauratis literis cordi
inscribitur: aspera leges intentant supplicia, ast num-

mi blanditiis sese inferunt. O magna sed occulta vis munerum ! Quis munera dantem non redamaret ? In Ruscia quidam vir opulentus canem sibi charum & mortuum, sepelivit in cœmiterio. Judex ejus loci pecuniæ cupidus, virum hunc velut maximi criminis reum ad se puniendum vocat, qui quinquaginta aureos secum ferens ad Officiatum devenit: & cum ob sepulturam canis in cœmiterio condemnatus esset ad carcerem, ô Judex, inquit, si nosceres quâ prudentia hic canis fuerit, non mirareris, quòd sepulturam inter homines meruerit, nam fuit plusquam ingenio humano, in vita & præcipuè in morte: testamentum enim in fine vitæ condidit & tibi quinquaginta aureos reliquit, quos mecum detuli: quâ accepta pecunia Judex testamentum & sepulturam comprobans, virum adsolvit. Ita auro capiuntur homines, ut laqueis aves. Ita, Xenia & bona excœcant oculos judicum. *Ecclef. c. 20.* Quid prodest lucrum auri cum damno innocentia & integritatis?

*Judicis est recti nec munere nec prece flecti, &
Sede sedens ista, Judex inflexibilis sta.*

Th. XV.

Quæ de Curiarum & Cancellariarum Justitiæ usu & abusu diximus, de Judicum in ea virtutibus & vitiis, ea etiam extendenda sunt, ad Procuratores, Scribas, Secretarios & Advocatos. Procuratorum officium

cium perquam necessarium esse non negamus. *l. 1 ff. de Procurat.* : imò proximum est Advocato ejus officium, quia uterque in judicio alienam causam agit, Advocatus postulando, hic instar Domini curando. *§. pen. Inst. de iis per quos ag. poss.* Filius familiâs tamen quicquid ex procuratione sibi quæsit, non est quasi peculium castrense, auctoramentum scilicet doctrinæ alicujus vel ingenii, communes tantum præstat operas in sollicitanda & tractanda causa, non operam singularis doctrinæ & honestissimæ artis, ut Advocati, qui debet esse *Antistes Justitiæ Jurisque tutor ac vindex.* Officium Procuratoris est privatum, non tam honorabile *l. 34. C. de Decur.* non tam dignitas quàm onus: post litis contestationem litis dominus appellatur, & in causa sibi mandata factum ejus Domino nocet & prodest *c. 1. 2. d. confess. in 6.* quare causæ suæ debet esset custos, institor, Argus; peritus cautor & formularis, sine dolo & fraude, sine machinatione & fallacia defendere alterum boni viri arbitratu, & quia circa lites versatur, omnia mala noscere debet. *Sichard. in l. C. mandat.* non tamen facere. Ut Medicus notitiam habet non solum salubrium herbarum sed & venenorum & noxiorum phârmacorum: sed ô quàm multi reperiuntur, qui nunc in foro versantes tantum malitiæ non tantum addiscunt sed etiam in praxin deducunt, homines perversi & nequam, jura confundentes, lites susci-

tantes

tantes, transactiones rescindentes, dilationes in-
ctentes, veritatem suppressantes, mandacium foventes,
quæstum sequentes, æquitatem vendentes, actioni-
bus inhiantes, versutias concipientes, litium sarcina-
tores, vultuum, vocum ac nutuum aucupes, arcano-
rum captatores, homines circumforanei, aurum rapi-
entes ut ignem naphtha: dum lis insidet animo tuo,
verba eorum sunt blanda & butyrina, molliora oleo,
revera tamen stricti gladii conscientias hominum per-
vertentes, judiciorum sanctitatem permutantes, com-
perendinationibus judicia differentes, litigantium patri-
monia abligurientes, ad tribunalia poperantes tan-
quam ad auream mellem, quorum nares si afflave-
rit uspiam rubiginosi aura Marsupii, ecce oculos Argi,
manus Briarei, Sphyngarum ungues. Horum ergo
patrocinium, annon rectè dici potest, verum latro-
cinium. Æsopica gallina cùm ægrotaret, feli inter-
roganti quasi ex benevolentia, *quomodo valeret?* re-
spondit: *Rectè, ait, sed si tu discedas.*

Th. XVI.

Scribarum quoque munus Curiis & Cancellariis est
perquam necessarium, *arg. rubricâ Cod. de tabu-*
lariis, Scribis & Logographis. Sub Scribis continen-
tur notarii, exceptores, qui acta Judicum scribebant.
l. inter eos §. 1. ff. quib. ex caus. major: Regendarii.
Nov. 15. Secretarii, Cancellarii: Scribarum fit mentio

in

in facis literis 2. Sam. 8. & 9. 20. 2. Reg. 12. & 22. Ierem 32. Matth. 2. Ex Pharifæis etiam aliqui erant, *Scriba*, aliqui non illi ita dicti, non quia simpliciter scribebant, sed quia erant *Legisperiti*, & ex Prophetarum libris respondebant: uti hodie viri docti vocantur *literati*, *Grammatici*, *Philosophi*. Esd. c. 8. *Cum esset Scriba & ingeniosus in Lege Moysis quæ data est à Domino Deo Israel, docere & facere.* Nomen hoc fuit dignitatis summæ, qualis eras *Cancellarii*, proximi à Rege, decreta nomine Regis concipientis, scribentis, promulgantis, lectitantis qualis fuit *Sarajas Davidi*. 2. Reg. c. 8. *Sobna Ezechie*. 4. Reg. 18. de quo *Symmachus*. *Quæstor es, Legum conditor, Regalis consilii particeps, Iustitia arbiter: Notarii à notis dicebantur veteribus usitatis: hodie sumitur pro persona publica auctoritate Pontificis vel Imperatoris, vel etiam aliorum qui id jus habent, ad id, constituta, ut contractus, ultimas voluntates, & alia hominum varia negotia in scripturam publicam & authenticam redigat, ut plenam fidem illa tam ad præsentium quàm posterorum memoriam faciant. Cavendum ei ne instrumenta conscribat super negotiis illicitis, nè ideo infamiam incurrat, aut privetur officio Notariatus: quare doctrina etiam in iis requiritur, ne nimia in peritia eorum destruat mundum & conscientias bonorum virorum ponat in magno discrimine.* *Armarium Scriba, fortuna cunctorum est.*

Secretarii in officio sunt eminentiori, secundum Magistratus, Dominos, Duces, Reges ac Imperatores, quibus inserviunt. Principes his sua committunt secreta: hos, *Regis consilium solos decet scire gravissimos*. Tribuni dicuntur Notariorum *l. Cod. de primicerio & Notar.* Referuntur ad *spectabiles & clarissimos*: jus gladium gerendi & cingulum habebant. *Auxentius* Imp. *Licinius* Secretarius, qui cum ei mandaret, ut insignem ramum multis refectum uvis amputaret & idolo Bacchi offerret, & ille, utpote Christianus hoc facere recusaret, ejectus fuit à Curia & cingulo exutus.

Th. XVII.

ADvocatorum quoque hinc mentio facienda, digni enim habentur honoribus omnibus *l. laudabile. l. 1. C. d. Adv. div. lud. l. 14. C. eod. l. 1. ff. d. var. & extr. cognit.* Quippe *Justitia* procul dubio periret, si deesset, qui *justitiam* allegaret. Res sacra est clienti afflicto patrocinium præstare. Anteponenda vita boni Advocati vitæ multorum religiosorum, sacrificat sacrificium *Justitiæ* Domino, qui enim *justitiam* colit, Deo libat. A feris non discrebant homines soluti legibus. In ea Republica, quæ scripto jure regitur, Deos imperare affirmat *Aristoteles*. Verbum Dei quasi Advocatus fuit Davidis. Hic quasi os, manus & anima Regis est, colenda tanquam imago Dei viventis. *Alexander* Imperator quantopere amavit *Vlpianum*.

l. 4. C. locat. l. 4. C. d. contr. & comm. stip. Trajanus nil sine *Neratio Prisco* decrevit, imò huic aliquando dixit, *commendo tibi Provincias, si quid mihi fatale contigerit.* Optimi Jcti & Consilarii, Principum omnium optimum reddidērunt *Antoninum Pium.* Alii plurimum tribuunt generis nobilitati, & Cæsar intellexit in eruditiois esse aliquid stemmatibus præstantius: Mille equites, ait *Sigismundus*, uno die facere possum, ast Doctorem unum ne mille quidem annis. *Aphonsus* Rex omnia optabat perdere, quàm ut tantillum eruditioni suæ discederet. Scientiæ filia nobilitas, maximè *Iustitia* seu *civilis sapientia*, cujus tres quasi erant partes, *cavere, respondere, judicare.* Hujus scientiæ cultores sunt Advocati, quæ excepta Theologia omnes alias excellit artes: quâ sublatâ nemini potest esse exploratum quid suum, quid alienum? Hinc Jcti ad omnium dignitatum apices promoti. *Minutium* Advocatum *Hieronymus* in numero ponit virorum illustrium? *Plinius* quantus fuit Advocatus? Pontifex *Clemens IV.* Jctus fuit, totius Gallia primarius Advocatus. De horum variis & egregiis privilegiis, vide *Capollam* in *tract. de Imp. elig. in verbo: dignitas.* *Alexandrum* in *l. Centurio ff. d. vulg. & pup. subst.* Ob hæc excellere debent multis virtutibus & vitiis carere, observare tria illa juris præcepta, pauca verba sed multa substantiæ. In consiliis non erunt contumaces,

cum præstet recurrere quàm malè currere: sed adesse debet suadendi libertas & maturitas: horum consilia averfanda quæ velocius quàm asparagi cocta sunt: consilia calida prima specie læta sunt, tractatu dura, eventu tristia: *Ante consultationem* omnes debent affectus deponere: *In consultatione* ad tria respicere, ad objectum, ad finem, ad media. *Post consultationem*, ut consilium maneat secretum, mirabilia operabitur, si propalatur, annihilabitur. Dolendum hodie ob pravam hanc consuetudinem, quâ consilia æstimamus bona vel mala, si bene vel malè successerint. *Plin. lib. 5. Ep. 21.* Quis dabit consilium, si etiam bonum consilium, damno sit? Si eventum præstare debet cum fide? Mediocritas tamen hic præferenda subtilitati ingenii? prægrandia ista acria & acuta ingenia minimè sunt expediti consilii & novandis rebus aptiora quàm gerendis. Laudandi hi Advocati Consilarii, qui plus Deum quàm Principem timent: qui enim solius superioris ducuntur respectu, sunt idololatræ: qui solius Regni vel Reipublicæ, *Athei & Machiavellistæ*: qui sui ipsius, *Epicurei & Voluptuarii*: qui pietatis & Justitiæ, veri sunt Regni ac Reip. conservatores, ornamentum orbis, splendor civium, asylum mundi, sanctissimus ordo & morum lumina. O quàm pulchrum spectaculum!

A *Advocatus Jurisperitus*, ordinator litis, causæ ordinandæ architectus, Juris, formularum & usus forensis erit callentissimus, ut omnes causarum cardines, articulos, perfugia ac subsidia possit noscere, examinare & scire, in quo articulo sit positum robur & quasi fatum controversiæ, ne per negligentiam vel imprudentiam causam amittat. Titulum ergo & Gradum *Licentia* non pro forma aut furo debet gerere, nullo habito respectu ad scientiam sed sola nummi probatione in pondere, numero & mensura, materia & forma: Syllabarii Doctorculi, solidioris omnis eruditionis expertes, in ludo litigatorio Analphabeti, infantes segnes, improvidi: libros sæpe habentes ornatos & multos, ut docti & plurimæ lectionis videantur, quos indoctos *Ludovicus II.* Galliæ Rex ob instructissimas Bibliothecas similes dicebat esse gibbosos, qui molem è dorso portarent eamque nunquam inspicerent. Quænam major est corruptela Judiciorum, quàm hæc publica quasi indulgentia, in largiendis aut dividendis titulis Doctoratus, Licentiæ & Advocaturæ, quibus fretus Juventus, *cruda adhuc studia in forum propellit.* Certè nulli de Republica pejus merentur, quàm qui Licentia concedendi jure tam licentiosè utuntur. Facilitas hæc nervos industriæ Studiosorum dissolvit, quibus intendendis unicùm

foret subsidium severa promotio, in qua non tantum expendenda esset peritia, sed animi quoque indoles, mores, vita, fama. *l. 2. C. d. dignit.* Generosior est Jurisprudencia, quam ut cum notatis, famosis, aut scelere aut turpitudine vitæ inquinatis debeat sociari. Unde ergo est, quod ex honestissimo studio tot prodeant rabulæ, litium incitabula, turbatores concordiae & quietis: quorum vita nil sordidius, ingeniis nil obscurius, judiciis nihil magis plebejum, origine nihil ignobilius, fama nihil ignotius, scientia nihil ignorantius. Stellionatus crimen committitur ab his Professoribus, qui hos promovent in Doctores aut Advocatorum Collegium, contra *l. 3. §. 4. C. d. Advoc. Et l. 11. §. 1. C. eod.* Horresco referens illud ex Politicis *Adami Contzen.* *Eos Academicos peccare mortaliter, qui gradibus & titulis insigniunt indignos, adeoque velut publico testimonio Tribunalibus ac Dei Ecclesiis imponunt.* Ob hanc facilitatem ad Doctoratum per argenteos Ducatos, & Patagones rogavit nonnemo Professores, annon equum suum ad eundem gradum admittere vellent; respondebant quod sic: *nam cum creaverimus asinum in Doctorem, cur non & equum?* Hinc illa sinistra vulgi judicia passim audiuntur de JCris & advocatis, quod sint *bonorum extortores, legum contortores.* Cautio ergo prima erit, non suscipere patrocinium malarum causarum, causæ bonæ urgendæ & præstandæ assiduitatem

tatem præstare, nihil enim circumspectis Advocatis est tam formitabile, quod diligentia sua præcavere non possint: Si autem hoc non possint, si ob varios in jure casus anxietas & fundamentum dubium in eos cadat, consulere debent Confratres peritiores: *sæpe revelatur minori, quod major ignorat. c. esto. dist. 95.* Vir magnus, qui futurus, nec se ipsum nec sua diligere, sed illud quod justum est, sive à se, sive ab alio quovis suggeratur: qui ignorantiam suam sapientiam opinantur, quamvis nihil sciant, scire tamen omnia arbitrantur: scientia moderata & modesta, amat instrui: instructa non ideo minor esse timet. Rectè *Livius: qui de sua unius sententia omnia gerit, superbum judico magis quàm sapientem: Sapientior omnibus eris, si ab omnibus discere volueris. Quod tu non nôsti, fortassis novit asellus.* In suo quisque negotio quis hebetior est, quàm in alieno: turbida enim sunt consilia eorum, qui sibi suadent. Affectus Consiliarius pessimus. Sæpe caro & sanguis est causæ malæ resolutionis: Rectè *Decius* scribit, sibi molestum non esse, scripta sua à posterioribus argui: nam, inquit, iniquus essem Judex si nollem ab aliis reprehendi, cum ipse solitus sim aliorum dicta oppugnare, pro veritate, non contradicendi studio. Nil ergo magis necessarium in causis arduis, quàm consilium: sapientia & consilio florent
Regna

Regna & Respublicæ: nullum certius præfagium ruinae Principum ac Reipublicæ, quàm si Deus mentem illis ita imminuat, ut repudiatis sapientum consiliis, homines provehant novos, stolidos, imperitos, vecordes, ad sentatores, qui omnia ad ipsorum gratiam faciant & loquantur, quare sibi in tempore prospiciant, de viris ut loquuntur qualificatis, doctis, lynceris, quibus illis æquè ac pane, quo vescendum, opus ac necesse est.

Müssen derowegen gottseelige fromme Regenten/ Fürsten und Herren darvor halten/ daß treue fromme Diener und Gesinde/ sie seyn Außländische oder Einheimische/ eine grosse Gabe Gottes/ und daß es-der Regenten höchster Schutz sey/ wo er etliche treue Leute zu Hofe und in Aemptern hat: Dann ein einziger böser Bube bey Hof kan viel Gutes verderben und verhindern:
Theod. Reinf. in polit. Bibl. par. 2. axiom. 59.

Th. XIX.

Boni Advocati officium litigantibus se præbere consultorem, non litium & calumniarum conflatorem, non prævaricatorem. *Lev. 19. Non facies calumniam proximo tuo.* Hac pessima fera, hæret & habitat in pessimæ naturæ medullis, nec jam inter culpas censetur sed mores ô quàm multa sunt in Judiciali & Justitiæ munere, studio partium & consulentium, quæ injuriæ quam juri sunt propiora!

Nihil

Nihil tam de forme, tam contradecorum, quàm ad civiles illas de justitia contentiones adjungere contumeliam, calumniam, probra aut aliam naturæ acerbicatem contra legem, *quisquis C.d. postul.* Bonus Advocatus Sacerdos & minister est sacrosanctæ Justitiæ, non debet ergo quenquam verbis vel scriptis lædere aut traducere aut infidâ advocacy damno afficere, aut adversarii sui jus dolosis subterfugiis & frustratoriis dilationibus impedire aut remorari. Abominabilis hic est apud Deum, qui malum bonum & bonum malum, lucem tenebras, tenebras lucem appellat: absint ergo verba ambigua & duplicia dicta, nieteria sæpe novarum litium: absint apices illi juris ex minutissimis rebus, interpunctionibus, ambiguitatibus, quibus plerumque sub auctoritate Juris scientiæ perniciose erratur, absint strophæ & antistrophæ forenses, sophismata & antisophismata, insidiosæ interrogationes, per quas, ut per legitimas disputationes verû à falso non discernitur, cum veritas non quærat angulos sed simplicitatis sit amica: Sophistica hæc est simulata non vera Philosophia, quare jus quærit sed victoriam & quocunq; modo adversarium supplantare: ô quàm multa etiam in hoc judiciario bello sunt inania, quæ in extrema quadam ordinis pompa, quàm in verâ causæ cognitione occupantur! Quantus abusus Jurisprudentiæ, si tota ad disputandi argutias & calumniandi

G

artes,

artes, non ad æqui aut iniqui iudicium dirigatur. V-
 teres simpliciter & candidè procedebant in suis for-
 mulis Judiciariis, quod docet formula manus conse-
 rendæ in jure, & formula vindicationis. H. E. R. E. I.
 Q. M. E. A. *banc ego rem ex jure Queritum meam esse a-*
jo: excipiebat A. F. E. C. V. At ego eam contra vindico:
 & formula in actione personali A. T. M. D. O. *ajo te*
mibi dare oportere. Respondebat per A. *ajo* vel N. *nego.*
 Judices post causæ cognitionem tabellas in cistam con-
 jiciebant hisce notatis literis: A. id est, *absolvo.* C. *con-*
demno, N. L. *Non liquet.* Aut in Curiis & tribunalibus
 quænam hodie occurrunt aucupia verborum & lite-
 rarum tendicula, captiunculæ forenses, conclusionum
 formalitates, oppressiunculæ non tantum timidorum
 sed etiâ prudentium: quæ lex, quod Sctum, quod edictum,
 quod fœdus, quod testamentum, quæ stipulatio non in-
 firmari aut convelli potest, si ad verba rem desistere
 velinuis. Parisiensis quidam civis opulentus laborans
 morbo vocavit Notarium, rogavitque ut conciperet
 suum testamentum in talibus verbis ac terminis, ut
 in explicatione mentis suæ nulla postea oriretur dispu-
 tatio: at responderebat Notarius: *Ridesne me Domi-*
ne? putasne quod plus possim quam Deus ipse? Ipse fe-
cit unicuique testamentum, tamen fuerunt, sunt & erunt
semper mille disputationes; & vis tu ut unum tibi faciam
ubi non erant? Verus ergo Advocatus non quærat pla-
 cere

cere parti, sed juri & veritati: non ergo instruat clientes suos, ut negent veritatem, ut falsum respondeant. Cuidam Advocato rusticus promisit Ducatum, ut doceret se modum nunquam causâ cadendi: docet ergo, *ut semper negaret omnia*: Advocatus petit mercedem; Rusticus memor præcepti, negat se promississe. Tales sunt, qui docet grandia loqui, sed operantur exigua, largissimi sunt promissores, parcissimi exhibitores, sapientes, ut faciant malum, eloquentes, ut impugnent verum: monstrantur digito fraudum magistri, ille prudentior judicatur, qui peritior est fallendi.

Hec quot in ambages, quot distorquetur in orbes,

Quot nodos omnis Regula Juris habet.

Advocatus quidam, foelix causarum Patronus, hoc munere se abdicavit & factus est religiosus, & ob dexteritatem, in rebus agendis Coenobio præfectus: verum rebus sibi non tam prosperè ut prius succedentibus, mirati fratres causam inquirunt: ad quos illè: *Dei timor, qui mihi ante oculos, facit, quòd tam libere mentiri non audeam, veluti in seculo solebam.*

Th. XX.

PRæterea bonus Advocatus lites abbreviare debet, aut circumscriptius aut concisius eas tractare, per fugiaque forensia intercludere & rimas fugitivorum obstruere: bonâ enim fide qui litigat, ad sententiam

properat: ast qui timet catastrophem, è lite litem ferit, diem ex die dicendo: imò victi in uno foro provocant ad aliud, & hæc provocatio morandi *judicii* potius quàm auxilii causa fit, imò calumniarum est alimentum. *Foliographi*, qui ea, quæ tribus foliis & articulis comprehendi poterant, ad 30. prolongant, chartam implentes variis heterogeneis, quibus Judicum oculos deterrent & quasi longis Iliadibus confundunt & obruunt, pessimi sunt caularum disceptatores, & raro quid solidi afferunt: vacua vasa plurimum sonant: mingo docti verba multiplicant & de re pusillâ longa texunt procemia: foliola congerunt verbis plena, substantiæ vacua, quibus non terminantur negotia, nisi marsupiiis evacuatis: brevis ergo est: bonus Advocatus quam Juris auctoritas in ipsa causæ penetralia rectâ deducit, non enim multa spargit tela, qui certa ictus destinatione jugulum causæ ferire callet: nihil magis manifestam facit veritatem, quàm brevis & pura narratio. Rectè *Bernhardus lib. 1. c. 9. ud Pontificem Eugenium*. Minor quemadmodum religiosa aures tua audire sustinent bujusmodi disputationes Advocatorum & pugnas verborum, quæ magis ad subversionem quàm ad inventionem proficiunt veritatis: corrige prævum morem & praeide linguas vaniloquas & labia dolosa elau-de. Rectè *Fabius*: indocti dicunt omnia, doctis, est modus & electio: & aliud est loqui multa, aliud id lo-

qui

qui quod expedit. Verba causæ tria sufficiunt, bonæ. Non oportet multis verbis pauca dicere, sed paucis multa. Verba nimia molesta sunt ubique. Ob id binas habemus aures & os unicum, ut plura audiamus, loquamur paucissima. *Optimi homines in dicendo brevisissimi sunt.* Ne quidem si vera dicunt creditur loquacibus. Ut corpore tenues, veste se solent dilatare, sic ingenii aut sapientia inopes diffundunt se verbis: qui multa loquuntur, aut falsa aut superflua loquuntur, quæ omnia à veri JCi & Advocati professione debent esse alienissima.

Th. XX

Verus ergo Advocatus & Justitiæ Administrator in Curia & Cancellaria, non nisi iusta agit, nec tam amat forense bellum habere, quam justè gerere. Juris certâ fiduciâ qui nituntur, statim vela pandunt litis, progredi cupiunt altum, causam adversarii fugacis faucibus premere student, omnia tergiversationum & dilationum commenta conterunt, palam & via regia dimicant: ast causæ injustæ sibi consci, non æquitate, non bona fide nituntur, sed contentione forensi, coitione judiciali, proluisionibus immorantur, præscriptionibus moratoriis litem trahunt, & quovis modo per fas & nefas ad victoriam grassantur, dum causis iniquis colores quærunt, si modò recipiant: quædam enim prorsus non sunt defen-

denda iusto Advocato: injustus, ut equus admistrarius hinnit ad equas, ita adhinnit etiam ad causas injustas, quando sentit odorem lucri. Tutius nos semper iusto Advocato committimus & probo. Quis utilem causæ suæ judicabit, quem domi scelestum cernit? Hoc esset in cœno fontem quærere? ex turbida aqua potum petere: Papinianus ne mortis quidem metu adduci potuit, ut parricidium *Caracallæ* defenderet, *facilius*, dicens, *id patrari quàm defendi posse*. Non ita *Baldus* revocans consilium ob metum Principis, quasi à non intelligente scriptum, si illud esset offensurum aures sui Regis. Quot hodie non *Papiniani* sed *Baldi* sunt imitatores! Illum excuso, qui ex mala clientis informatione causam injustam in principio putavit esse justam, si postea eam deserat. *l. rem non novam. §. Patroni Cod. de Judic.* Et illum laudo, qui partes litigantes ad amicabilem transactionem deducit, ne periclitetur amicitia & mutua dilectio tantopere Christianis commendata, nè tenipus pereat, facultates atterantur, nè animi nostri tranquillitas cunctis rebus præferenda, turbetur: hic Advocatus ostendit se non proprium commodum sed solam clientis utilitatem respicere. *Verecunda cogitatio ejus, qui lites execratur. l. 4. ff. d. alienat.* Impium est consilium suadentis clientibus, ut iudicis animum donis & muneribus expugnent. *l. ut puta. §. sed etsi. ff. d.*

ff. d. cond. ob turp. caus. ejuravit enim iniquam calumni-
am l. 14 §. 1. C. d. Judic. quare suadebit clienti victori
ut adversario restituat quod injusta sententia ademit;
imò ipse turpissimum quod accepit salarium restitue-
re tenetur. Sed rectè Augustinus Ep. 36. *Quis Ad-
vocatus reperitur, qui dicat suscepto suo, Recipe quod mi-
bi, dum malè adessem dedisti: redde adversario quod ei
me iniquè agenti abstulisti.* Vladislao Polonia Rex cùm
suasu uxoris bona alicui ablata restituisset, dixit uxor
Regina: *Pignora quiden reddidimus, ceterùm lachrymas
eorum quis reddet?* Lachrymas viduarum, pupillorum
& innocentium clientium quis reddet? Non debet
pudere Advocatum mutare consilium & opinionem,
visis melioribus rationibus. Qui causas desperatas
contra conscientiam fovet, easque voce, lingua,
scriptis defendunt, solent nonnunquam mori ut vixe-
runt, & ita in eo puniuntur, in quo deliquerunt. Ma-
lo cuidam Advocato, cùm laboraret in extremis, ob-
lata ei est SS. Eucharistia: & dicebat ille: *Judicetur
primò an justum sit ut eam accipiam: cumque adstan-
tes dicerent: Nos hoc justum fore judicamus: respondit:
Vos, qui pares estis mihi, judicare non potestis:* Lex e-
nim dicit, *Par in parem non habet imperium:* & sic ex-
piravit. In summa, qui aliis per injustitiam nocet,
seipsum maximè lædit.

UT tandem concludam hanc disputationem: Jurisprudencia ars omnium liberalissima, non magis corrumpitur quàm ab avaritia. Cur enim discitur? non ut à clientibus stipem colligamus, non ut ex reorum sordibus splendorem quæramus, non ut vocem & fidem vendamus, aut quæ alia fas & nefas confundens dicat avaritia, sed ut licitum ab illicito distinguamus, æqui & iniqui limites subtili discrimine designemus, Reip. & singulis consulamus, quare indole sua quia in commune & alienum vergit bonum, non debemus honestæ hujus matronæ decus turpi quæstui prostituere, & quasi ex *Helena* Scortum facere, quod fit, quando Jurisprudencia ad solum quæstum & divitias abutimur & eam ut vulgare opificium nobis ad subsidium paupertatis vel ut instrumentum divitiarum comparamus. Tunc pulcherrima Jurisprudencia sordidis foedatur ministeriis, nec fides integra manet ubi magnitudo quæstuum speratur. Statera linguam habet ad duas lances, sed semper lingua se ad ponderosorem inclinat lancem: ita iniquus Advocatus linguam habet & duas manus: aut manus illa cui plus imposueris, trahit semper ad se linguam: hæc damnifera est, nisi funibus argenteis ligetur. Quidam Advocatus *bovem* accepit ab uno litigantium, ab alio *equum*: hic postea coram Judice tacebat. Is,

qui

qui bovem dederat, dixit: *bos loquere*: ac respondebat ille, *non possum, quia equus non permittit*: & sic neutri advocavit; Et ita *Justicia, ars equi & boni*, facta est *ars equi & bovis*. Vidua quædam novam bigam dedit suo causidico: ast pars adversa dedit bovem. Advocatus die judicii instante primo egregiè agebat pro parte viduæ, ast in fine contra eam directè conclusit: Ad quam vidua: *Domine, malè vadit biga*. Responderet Causidicus, *Oportet omnino quòd sic incedat, quia bos trahit eam*. Unus avaris Judicibus oleum donaverat, alter porcum: dicebant Judices, porcum vas olei fragisse, & ita qui majus donum attulerat Jus favorabilius obrinebat. Vulgò dicitur, *ungendas esse manus Iudicum & Advocatorum*: hoc mysterium simplex quædam foemina non intelligens, vas oleo plenum secum tulit, manusque inungere cœpit: Advocatus mulieris simplicitatem, actionis tamen mysterium intelligens, *Satis nunc*, inquit, *unctionis est, sed ad extergendas manus, ulnis aliquot melioris panni mihi est opus*: quod cum illico mulier attulisset & paulò post quod intendebat obtinuisset, ad vicinos reversa, *unctionis*, ait, *nulla vis, sed deterfionis major est*. Demostheni, olim objectum, cum non *Synanchen* sed *argyranchen* pati. Dolendum profectò quòd togæ illa ornamento propter avaritiam apud multos tam malè audiant? propter prævaricationes, quando in eadem causa pro

H

utraque

utraque parte consulant: quando justæ causæ requiriti defensionem deferunt, quando viduis & pauperibus aut aliis miserabilibus personis & omni humano præsidio destitutis opem ferre gratis recusant, quod tamen in multis Academiis gradum Doctoratus aut Licentiæ susceperunt conceptis verbis jurare debent. Non videbit diem malum, qui dies bonos habere pauperem fecit. Hoc modo patrimonium DEO creditur, quod nec Respublica eripit, nec Fiscus invadit, nec calumnia aliqua forensis evertit, quia tuto hæreditas ponitur, quæ Deo custode servatur. Salarium tamen honestum à valentibus solvere, ad probabilem quantitatem pro conditione causæ, pro Advocati facundia, non pro codicum vel foliorum scriptorum numero, quid enim hoc aliud esset quàm ultro incitare loquacitatem, rectè accipiunt Advocati: quod Judex qui de causa cognovit potest definire. Rectius tamen esse statuit *Parthen. litic. lib. 2. c. 7. n. 5.* & publicum malitiæ Advocatoriæ remedium, si in qualibet Curia vel Cancellaria numerus Advocatorum restringatur, iisque tunc Salarium ex publico constituatur Principis arbitrio, ad quod omnes litigaturi conferre quid deberent, utque adeò nihil acciperent ab ipso Cliente: consilium optimum: sic enim multorum nobilium, civium, subditorum & rusticorum patrimonia non ita exurgerentur, ut hodie fit à rogatis illis Vulturibus

&c

& Harpyis , qui etsi in utramque autem dormiunt ,
tamen opera eorum ex morâ & tempore æstimatur :
& nisi hoc fieret dicunt , so möchte der Teuffel ein Adv-
ocat oder Jurist seyn. *Aut. Disc. Von Justitiens*
Werck pag. 24. Hæc de usu & abusu Juris in Curliis
& Cancellariis circa lites , circa temerarios litigantes
& Justitiæ ministros dicta sufficiant , utinam pro de-
finiendis litibus remedia opportuna possint inveniri !
concludo cum *D. Augustino Serm. ad Judices 35.* *O Ju-*
lices scientiam & Justitiam mundi amantes , attendite
quid agatis , nam scientia mundi pleni est is & in ipsa
moriemini : quæ est enim scientia mundi , nisi thesaurum
congregare , lucrum terrenum acquirere , decipere proxi-
um , mentiri , jurare , justitiam cautè pervertere & simi-
lia in cunctis agere : ista enim sapientia mundi est , in istis
ferè tota vita vestra consistet & ideo attendite , qui judi-
catis terram , quia dum , humana curantur , æterna per-
duntur gaudia. Proh dolor :

Improbilas tanti , probitas jam denique parvi
Penditur , ut probum , sit pene esse probum.

Sed gaudeamus ,

JESUS CHRISTUS Rex cœli & terræ , Dominus
mundi , magni consilii Angelus , Redemptor no-
ster , Advocatus omnium bonorum est in cœlis.

EI SIT LAUS ET GLORIA IN SEMPITER-
NA SECULA. AMEN.

COROLLARIA

NOBILISSIMI.

DN. RESPONENTIS.

I.

Nostra aetatis virorum magnorum, non quanta
veterum est aestimatio.

II.

Tyrannorum proprium est auricularios, speculatores
& delatores alere.

III.

Princeps viridos suorum animos non debet deprimere.

IV.

Hominibus illustribus est peregrinandum.

V.

Gloria bellica soli Principi, cujus auspiciis parta, est
tribuenda.

VI.

Illustres cum humilioribus matrimonia contrahere
non debent.

VII.

Destinata sacris bona licitum aliquando in profanos
usus convertere.

VIII.

Herorum filii noxa.

IX.

* (61) *

IX.

Nescit regnare qui nescit dissimulare.

X.

Sacerdotium cum officio politico rectè potest nonnunquam sociari.

XI.

Expedit ut belli Dux ipse praeliis intersit.

XII.

Nocturna praelia non probamus.

XIII.

Honesta victoria est, quæ paratur stratagemate.

XIV.

Servitus in natura fundamentum habet.

XV.

Non est vera Machiavelli sententia illa, quòd metui quàm amari sit tutius.

XVI.

Ex desperatione qui sunt pugnaces, non sunt dicendi fortes.

XVII.

Praelium inituri, clamare non est inconsultum.

XVIII.

Legatis non est licitum munera accipere.

XIX.

Pedites ut plurimum præstant in bello equitibus.

* (62) *

XX

Fugere simpliciter non est inhoneſtum.

XXI.

Amuletis militariſus nulla vis contra vulnera ineſt.

XXII.

Comitatus muliebris in exercitu non ferendus.

XXIII.

Mendici in Rep. non ſunt ferendi.

XXIV.

Fama magnum in bello momentum.

XXV.

Homicidas numerata pecunia non debemus impunes dimittere.

XXVI.

Ebrietas probroſa eſt.

XXVII.

Vtile eſt Reipublica, Juventutem aſſueſcieri Gymnaſtica.

XXVIII.

Conſuetudo ſepeliendi res pretioſas cum deſunctis non eſt probanda.

XXIX.

Plus ſæpe in duce quàm in exercitu eſt momenti.

XXX.

In bello αὐταρχία non eſt amplectenda.

XXXI.